

I salûts di De Anna, Franz, Fontanini, Honsell, Compagno, Pelizzo, D'Agostini e Gomboso. La biele letare di Arnaldo Baracetti

I 90 agns di D'Aronco, un pari dal autonomisim

Lis tantis animis dal Friûl tal palaç de Provincie di Udin par fâi fieste al professôr

E je stade fieste grande martars ai 19 di Otubar li dal salon dal consei di palaç Belgrât, sede de Provincie di Udin, par celebrâ i 90 agns di un dai paris de Patrie furlane, Gianfranco D'Aronco. Tignût tant che un dai plui impuartants protagoniscj dal autonomisim furlan, di plui di 60 agns al puarte indevant la bataie pe autonomie de nestre tiere.

Tal 1947, dut un cun Pier Paolo Pasolini e Chino Ermacora, al à dât vite al Moviment populâr furlan. Tal stes an D'Aronco al à firmât pal Friûl, cui rapresentants di al di Aoste, Trentin e Sud Tiròl, la *Declarazion di Desenzano* pe nassite des autonomis regionâls previodudis de Costituzion. Il professôr D'Aronco al à ancje dât fûr l'impuartant volum *Friuli, regione mai nata*, li che a vegnin contadis lis vicendis che, tai agns dopo la Seconde vuere mondiâl, a àn puartât ae creazion de Regione Friûl ignesie Julie cun cjâf lûc Triest, impen de Region Friûl cun cjâf lûc Udin.

L'incuintri pai 90 agns di D'Aronco al à viodût presin-



Torte cu la bandiere dal Friûl pai 90 agns dal professôr Gianfranco D'Aronco

tis a Palaç Belgrât lis autoritâts dal teritori di là di buine part des figuris storichis dal autonomisim furlan. Il president de Provincie di Udin Pietro Fontanini, tant che paron di cjase, i à regalât a D'Aronco il sigjil di arint cu

la acule simbul dal Friûl di une bande e la façade di palaç Belgrât di chê altre, opare dal mestri Piero Monassi di Buie. «Al è cun grant onôr, ricognossiment e rispjet – al à dit Fontanini – che vuê o din bon acet chi ae sô fieste di complean. Nol podeve jessi altri par vie che chest Palaç al rapresente pardabon i principis e i valôrs di fonde che il professôr si è batût e che ancjemò al scombat e al fâs sinti la sô vôs. Une vôs *vuide* par cui che, come cheste aministrazion, al crôt te fuarce, te ricjece e te autonomie di chest teritori. Un teritori che, cu lis sôs carateristichis, in primis la lenghe, nol à ancjemò avonde vôs in cjapitul».

Par rapresentâ la Region a

àn cjàpât la peraule l'assessôr ae culture Elio De Anna e il president dal Consei regjonâl Maurizio Franz. A àn volût puartâ il lôr salût ancje il sindic di Udin Furio Honsell (che i à regalât al professôr il sigjil de citât), il Retôr Magnific de Universitât dal Friûl Cristiana Compagno, il president de Fondazione Crup Lionello D'Agostini e il segretari dal Istitût Ladin Furlan Pre Checo Place-rean Geremia Gomboso. Il president de Societât filologjiche furlane Lorenzo Pelizzo al ricuarde la ativitât di D'Aronco dentri de Filologjiche tacade intal 1944 e, subit dopo de fin de vuere, continuade cu la nomine a segretari, diretôr dal *Ce fastu?*, curadôr dal *Strolic*, organizatôr di cunvignis ancje internazionâls su lis tradizions populârs e soledut un pari par gjenerazions di furlans.

Nol à podût jessi presint par problemis di salût Arnaldo Baracetti, un dai plui autorevui rapresentants dal Comitât pe autonomie dal Friûl, che dut câs al à mandât une biele letare a D'Aronco che e je stade lete di Bepi Agostinis.